Manchesmol nachts

Wenn der Mond unterwegs it, da schlorcht nex. Obwohl ar olta Bee hat. Dar find finsterli sein Wag.

Dan hat mer niet garn im Gsicht, wenn mer schlaff will, weil ar een zon Fanster nausziecht hömedi und mit zuena Aachn, säigt mer.

Wenn der Mond dia Wengert entlangleucht wia a Träublschtaucher, na schläft der Korscht, dia Peranospra und der vergassn Wengertsböibl.

Na härt mer blos alzamal an Liedfatzn von een, wua mit seinm Rausch eighenklt hemmziecht.

Weil mer mit Gsang besser dia Bettschtatt find. An dara der Mond schteht und een mit weißa Finger nou dia rot Nosn langt.

In Harbst nei

As it scho guet, daß mer kee Schwalm it.

Wenn mer aa hetzet sei Nast am Fachwark papp laß könnt, um dort nou zu fliechn, wua dia Sunna olla Tog übern Himml rollert und nie Verschteckerles schpielt.

Da its scho guet, daß mer kee Schwalm it.

Weil mer sou heeli dorchs Lindlalaab schlorch kann und der Wind een goldena Achslschtücker aus Kastaniablatter verleiht und wua een der Faderweißer, ohna daß ar schwarz werd, dan eegana Schlot putzt.

Guet its scho, daß mer kee Schwalm it.

Denn mer kann aa mit Hendschi auf dia Kerm und dorch dan dickstn Ohraschützer dorch geht dia Musik vom Karassall und a Bratworscht, braun wia der Heili Laurenzi, it kee schlachter Ersatz för dia Sunna.